

NÜXĨRAÜXÜ GA POPERA GA CUÁÜ ÜMATÜXÜ

Ore i tüxü maxëëxüchiga

1 ¹Pexçax tanaxümatü nachiga ya Tupana Nane ya Cristu ya yima woetama marü nüxıra yexmacü ga yexguma noxritama tauta naäne üxgu. Rü nüma rü Ore i Maxëëëruü nixĩ i naéga erü nüma nixĩ i tamaã nüxü yaxuxü i Tupanachiga rü tüxü namaxëëëxü. Rü toma ga norü ngüexügü na tixigüxü, rü nüxü taxínüë rü toxtetümaã nüxü tadaugü rü tomexmaã nüxü tingögügü. ²Rü yima Maxëëëruü ya Cristu rü toxü nügü nawex. Rü nüxü tadaugü rü duüxügümaã nüxü tixu na ñuxäcü yixü. Rü ñuxma rü pemaã rü ta nüxü tixuchiga ya yima Cristu ya tüxna naxäcü i maxü i taguma gúxü. Rü noxri rü Nanatüxütawa nayexma, natürü ñoma ga nañewa nangu rü toxçax nangox. ³Rü yema toma nüxü tadaugüxü rü nüxü taxínüëxü rü pemaã nüxü tixu na tomücügü pixigüxüçax, ngëxgumarüü i toma na Tanatü ya Tupana rü Nane ya Ngechuchu ya Cristumücügü tixigüxürüü. ⁴Rü

ngëmacax pexçax tanaxümatü i ñaã ore na wüxigu aixcümamaxüchi itaãëgüxüçax.

Ñoma ngóonexürüü name ya Tupana

⁵Rü ñaã nixĩ ga ore ga tomaã nüxü yaxuxü ga Ngechuchu ya Cristu. Rü pemaã nüxü tixu na ñoma ngóonexürüü namexü ya Tupana, rü nawa rü nataxuma i chixexü i ñoma ëänexürüü ixixü, rü bai i íraxü. ⁶Rü ngëxguma chi:

“Tanatü ya Tupanamücügü tixigü”, ñagügu, natürü chixri imaxëgu, rü tidoraemare erü tama aixcüma meã tamaxë. ⁷Rü ngëxguma chi Tupanariüü ngóonexüwa imaxëgu, rü yigümücügü tixigü i yixema, rü Tupana Nane ya Ngechuchu rü nagümaã tüxü inayanatauxëë i guxüma i törü chixexü. ⁸Ngëxguma chi nüxü ixuxgu rü:

“Changearü pecaduãx”, ñagügu, rü yigütama tawomüxëë, rü tidoraemare. ⁹Natürü ngëxguma chi Tupanamaã nüxü ixuxgu i törü pecadugü, rü nüma tüxü nüxü nangechaü rü tüxü inayanatauxëë i guxüma i törü chixexü, erü nüma rü mecü nixĩ rü taguma tüxü nawomüxëë. ¹⁰Natürü ngëxguma chi:

“Tangearü pecaduãxgü”, ñagügu, rü dorataãx nüxü tawogü ya Tupana rü tama aixcüma tawa nangëxma i norü ore.

Cristu rü tórü chogüruü nixi

2 ¹Pa Chauzacügüx, pexçax chanaxümatü i ñaã ore na tama chixexü pexügüxüçax. Natürü ngëxguma chi wüxie chixexü üxgu, rü nangëxma ya tümaétüwa chogücü nüxna ya Tanatü ya Tupana na tama tüxü napoxcuxüçax. Rü yima nixi ya Ngechuchu ya Cristu ya aixcüma mecü ixücü. ²Rü guma Ngechuchu ya Cristu rü nügü inaxã rü nayu na naxütanüãxüçax ga tórü pecadugü. Rü tama tórü pecadugüxicatama naxütanü, natürü guxüma i duüxügüarü pecadugü ta naxütanü. ³Rü ngëxguma chi naga ixünüëgu i ngëma tüxü namuxü ya Tupana, rü nüxü tacuax na aixcüma nüxü icuáxü. ⁴Rü ngëxguma chi wüxie:

“Choma rü Tupanaxü chachuax”, ñagügu, natürü tama naga taxünügu i ngëma tüxü namuxü ya Tupana, rü wüxi i dorataxáxü tixi. ⁵Natürü yíxema naga ñnuxë i ngëma tüxü namuxü ya Tupana, rü aixcümaxüchi Tupanaxü tangechaü. Rü ngëmawa nüxü tacuaxgü na aixcüma Tupanaärü duüxügü ixügüxü. ⁶Rü yíxema:

“Tupanaärü duüxü chixi”, ñagüxe, rü name nixi na meã tamaxüxü yema Ngechuchu ya Cristu meã maxüxürüü.

Tupanaärü mu i ngexwacaxüxüchiga

⁷Pa Chaueneëgüx, tama wüxi i ngexwacaxüxü i Tupanaärü mu nixi i pexçax chaxümatüxü. Natürü ñaãtama

noxriarü ügügumama pexü yexmaxü ga mu nixi. Rü ñaãtama nixi i Tupanaärü mu ga nuxcümaüxü ga marü nüxü pexünüëxü. ⁸Natürü ñaã Tupanaärü mu i pexçax chaxümatüxü rü guxüguma nangexwacaxü. Rü ngëxguma naga pexünüëgu i ñaã Tupanaärü mu na pegü pengechaügüxü, rü tama ëänexüwatama pemaxë, natürü Cristurüü ngëma ngóonexü i aixcüma ixüxüwa pengëxmagü. ⁹Rü ngëxguma chi wüxie:

“Choma rü ngëma ngóonexüwa changëxma”, ñagügu, natürü tümaëneëchi taxaixgu, rü ëänexüwatama tangëxma. ¹⁰Yíxema tümaëneëxü ngechaüxë rü ngóonexüwa tamaxü, rü taxuçaxma tüxcüü pecadu taxü. ¹¹Natürü yíxema tümaëneëchi aixë, rü ëänexüwatama tamaxü, rü ëänexügu tixü. Rü tama nüxü tacuax na ngextá taxüxü, erü tümacax naxëãne.

¹²Pa Chauzacügüx, pexçax chanaxümatü erü Cristugagu Tupana marü pexü nüxü nangechaü i perü pecadugü. ¹³Pa Papagüx, pexçax chanaxümatü i ñaã ore erü nüxü pecuaxgü ya Tanatü ya Tupana ga noxriarü ügügumama yexmacü. Pa Ngextüxcügüx, pexçax chanaxümatü erü marü nüxü perüyexera i ngëma ngoxo i Chataná i chixexüärü ürüü. ¹⁴Pa Buxügüx, pexçax chanaxümatü erü marü nüxü pecuaxgü ya Tanatü ya Tupana. Pa Papagüx, pexçax chanaxümatü erü marü nüxü pecuaxgü ya Tanatü ya Tupana ga noxriarü ügügumama yexmacü. Pa Ngextüxcügüx, pexçax chanaxümatü erü peporae, rü guxüguma peãëwa nangëxma i Tupanaärü ore, rü marü

nüxü perüyexera i ngēma ngoxo i Chataná i chixexüärü ürüü. ¹⁵¡Tāxü i pexü nangúchaüxü i ñoma i naâne rü norü ngēmaxügü! Ngēxguma chi texéaxü nangúchaügu i ñoma i naâne rü tama Tanatü ya Tupanaxü tangechaü. ¹⁶Erü guxüma i ngúchaügü i ñoma i naānewa ngēmaxü rü ñoma i naāneärütama nixi rü tama Tupanaärü nixi. Rü ngēma ngúchaügü rü ngēma nixi i taxüneaärü ngúchaügü, rü taxetüari ngúchaügü, rü yigü na icuaxüügüxü törü ngēmaxügümaā. ¹⁷Natürü ñoma i naâne rü guxüma i ngúchaügü i nawa ngēmaxü rü tá nagux. Natürü yíxema Tupanaga inüxē rü guxügutáma tamaxü.

**Ore i aixcüma ixixüchiga rü
ore i dora ixixüchiga**

¹⁸Pa Chauxacügüx, paxa tá nagux i ñoma i naâne. Pema rü marü nüxü pexinüchiga rü tá inangu i wüxi i Cristuarü uwanü, natürü marü inangugü i muxüma. Rü ngēmawa nüxü tacuax na marü nagúxchaüxü i ñoma i naâne. ¹⁹Rü ngēma Cristuarü uwanügü rü tatanüwatama nangēmagüchirex, natürü tama aixcüma tatanüxü nixigü, erü ngēxguma chi tatanüxü yixigügu rü tatanügu chitama narücho. Natürü marü tatanüwa inachoxü na meāma nüxü icuāxüçax na tama aixcüma tatanüxü yixigüxü. ²⁰Natürü pema rü Cristu marü pexna nanamu i Naāē i Üünexü, rü ngēmacax meāma nüxü pecuax i Tupanaärü ore. ²¹Rü ñuxma rü tama nixi na tama nüxü pecuāxüçax na pexçax chaxümatüxü. Natürü pexçax chanaxümatü erü marü meāma nüxü

pecuax i ngēma ore i aixcüma ixixü. Rü nüxü pecuax rü ngēma ore i aixcüma ixixüwa rü nataxuma i dora. ²²¿Texé tiixü ya yíxema idorataxáxe? Yíxema: “Ngechuchu rü tama aixcüma Cristu ya Tupana Nane nixi”, ñagüxe, tixi ya idorataxáxe. Yíxema tixi ya Cristuarü uwanü, erü tama nüxü tacuāxchaü ya Tanatü ya Tupana rü Nane ya Ngechuchu. ²³Guxāma ya yíxema tama nüxü cuāxchaüxē ya Tupana Nane ya Ngechuchu, rü tama nüxü tacuāxchaü ta ya Tanatü ya Tupana. Natürü yíxema Ngechuchuaxü yaxóxē, rü Tanatü ya Tupanaāxü rü ta tayaxō. ²⁴Rü ngēmacax name nixi i peyaxögüama i ngēma ore ga noxri nüxü pexinüxü. Rü ngēxguma peyaxögüamagu i ngēma ore ga noxri nüxü pexinüxü, rü aixcüma norü duüxügü pixigü ya Tupana Nane ya Ngechuchu rü Tanatü ya Tupana. ²⁵Rü nūmatama ya Ngechuchu ya Cristu nixi i tamaā inaxunetaxü na tūxna naxāāxüçax i maxü i taguma gúxü. ²⁶Nangēxma i duüxügü i chixexüwa pexü gagüchaüxü. Rü ngēmachiga nixi i pexçax chanaxümatüxü i ñāā ore. ²⁷Natürü pema rü marü Cristu pexna nanamu i Naāē i Üünexü, rü guxüguma pewa nangēxma. Rü ngēmacax tama penaxwaxe i to i perü ngüexēxü erü nūmatama i Naāē i Üünexü rü pexü nangüxēē i guxüma. Rü norü nguxēētae rü aixcüma nixi rü tama dora nixi. Rü ngēmacax name nixi na guxüguma Cristuaxü peyaxögüxü, ngēma Naāē i Üünexü pexü ngüexēxüācüma. ²⁸Rü ñuxmax, Pa Chauxacügüx, rü name nixi na meāma Cristuaxü peyaxögüxü na tama nüxü

imuñẽxũcax, rü tama ixãneẽxũcax
napexewa i ngẽxguma wena nuã
naxũxgu. ²⁹Pema nüxũ pecuax na Cristu
rü aixcũma mecü yĩxũ. Rü
ngẽxgumarũü ta name nixĩ na nüxũ
pecuáxũ na guxũma i duũxũgü i mexũ
ügũxũ rü Tupanaxãcũgü na yixĩgũxũ.

Tupanaxãcũgũchiga

3 ¹Idücax, Pa Chaueneẽgũx, ñuxãcü
poraãcü tüxũ nangechaũ ya Tanatü
ya Tupana! Rü ngẽmacax nixĩ i
naxãcũgũmaã tüxũ naxuxũ i nümax. Rü
aixcũma naxãcũgü tixĩgü. Rü ngẽmacax
ñoma i naãnecũãx i duũxũgü rü tama
tüxũ nacuáxchaũ erü Tupanaxũ rü ta
tama nacuáxchaũgü. ²Pa Chaueneẽgü
ya Pexũ Changechaũgũxe, ñuxma rü
marü Tupanaxãcũgü tixĩgü woo tama
tüxũ nüxũ nacuaxxẽ na ñuxãcü tá
ixĩgũxũ i yixcũra. Natürü nüxũ tacuaxgü
na Ngechuchurũü tá ixĩgũxũ i
ngẽxguma nangoxgu, erü tá nüxũ
tadaugü na ñuxãcü yĩxũ i nümax. ³Rü
guxãma ya yixema yaxóxẽ na
Ngechuchurũü tá tiixũ, rü tũgũna tadau
na Ngechuchu ya Cristurũü aixcũma
Tupanapexewa tamexũ. ⁴Natürü
guxãma ya yixema pecadu üxe, rü
Tupanamaã chixexũ taxü. Erü
ngẽxguma tama Tupanaga taxĩnũgu, rü
tapecaduãx. ⁵Pema nüxũ pecuax rü
Ngechuchu ya Cristu rü ñoma ga
naãnewa naxũ na iyanaxoxẽãxũcax i
tórü pecadugü. Rü nüma rü taguma
pecadu naxü. ⁶Rü ngẽmacax guxãma ya
yixema aixcũma nüxũ yaxõgũxe, rü
tama pecadu taxũgũechea. Natürü
guxãma ya yixema pecadu üechaxe, rü
ngẽmaãcü tamaxẽ erü taguma Cristuxũ

tadau, rü taguma nüxũ tacuax. ⁷Pa
Chauxacũgũx, Itãxũ i naga pexĩnüẽxũ i
ngẽma duũxũgü i pexũ
iyarütauxexẽchaũxũ! Yixema mexũ üxe
rü aixcũma mecü tixĩ, ngẽxgumarũü ya
Cristu na aixcũma mecü yĩxürũü.
⁸Natürü yixema pecadu üechaxe rü
ngẽmawa tüxũ tacuax na Chatanáãrü
duũxũ tiixũ, erü nüma i Chataná rü
noxriarü ügũgumama pecadu naxüechea.
Rü yemacax ga Tupana Nane rü ñoma
ga naãnewa naxũ na iyanaxoxẽãxũcax
ga yema Chataná üxũ. ⁹Rü yixema
Tupanaxãcü ixĩxẽ rü tama pecadu
taxüechea, erü naxãcũxüchi tixĩ. Rü
taxuacũma pecadu taxüechea erü Tupana
nixĩ ya tümanatü. ¹⁰Yixema chixexũ üxe
rü tümaẽneẽchi aixe, rü tama
Tupanaxãcü tixĩ. Rü ngẽmawa nüxũ
tacuax na texẽ tixĩgũxũ ya
Tupanaxãcũgü rü texẽ tixĩgũxũ ya
Chatanáãcũgü.

Name nixĩ na yigü ingechaũgũxũ

¹¹Name nixĩ na yigü ingechaũgũxũ i
wüxichigü. Rü yematama ore nixĩ ga
noxriarü ügũgumama nüxũ pexĩnüẽxũ.
¹²Rü tama tanaxwaxe na Caĩrüü ngoxo i
Chatanáãcũ ixĩgũxũ. Yerü nüma rü
naẽneẽxũ nimax. ¿Rü tacucax nixĩ ga
yamáãxũ? Nayamax yerü yema nüma
naxuxũ rü tama name, rü yema naẽneẽ
üxũ rü name. ¹³Pa Chaueneẽgũx, itãxũ i
pebaixachiãẽgũxũ ega pexchi naxaiegü i
ñoma i naãnecũãx i duũxũgü! ¹⁴Yixema
rü marü nüxna ítanguxũ i ngẽma yu rü
ñuxma rü marü maxũwaama
tangẽxmagü. Nüxũ tacuaxgü i ngẽma
erü nüxũ tangechaũgü i taeneẽgü.
Yixema tama tümaẽneẽxũ ngechaũxẽ rü

yuwatama tangẽxma. ¹⁵Rũ yĩxema tũmaẽneẽchi aixe rũ wũxi i máẽtaxũrũũ tixĩ. Rũ pema nũxũ pecuaxgũ i wũxi i máẽtaxũ rũ nũxũ nataxuma i norũ maxũ i taguma gũxũ. ¹⁶Rũ Ngechuchu ya Cristu rũ tórũ pecaduçax nayu, rũ yemaãcũ tũxũ nũxũ nadauxẽe i ngẽma ngechaũ i aixcũma ixĩxũ. Rũ ngẽxgumarũũ ta i yixema, rũ tanaxwaxe na fimemarexũ na nũxũ rúngũxẽẽxũ i taeneẽgũ woo nagagu iyuxgu. ¹⁷Natũrũ ngẽxguma chi wũxi i yatũãxũ nangẽxmagu i muxũma i norũ ngẽmaxũgũ, rũ chi nũxũ nadauxgu i namũcũ na nũxũ nataxuxũ, rũ taxuacũma:

“Choma rũ Tupanaxũ changechaũ”, ñanagũrũ, ega tama nũxũ nangũxẽẽgu i namũcũ. ¹⁸Pa Chauxacũgũx, tama name i taçxmaã rũ tórũ oremaãxícatama nũxũ tangechaũ i taeneẽ. Natũrũ tanaxwaxe i tórũ maxũmaã rũ tórũ ù i mexũmaã nũxũ tangechaũ.

Tama taxãneẽ na Tupanaa ingaicamagũxũ

¹⁹⁻²⁰Rũ ngẽxguma aixcũma yigũ ingechaũgũgu, rũ nũxũ tacuax na aixcũma naga ixĩnũẽxũ i ngẽma ore i aixcũma ixĩxũ, rũ Tupanapexewa rũ aixcũma naxãcũgũ ixĩgũxũ, woo ngẽxguma taãewa nagu rũxĩnũgu rũ:

“Tama Tupanaxãcũ chixĩ”, ñagũgu. Erũ nũxũ tacuax rũ Tupana nixĩ i taãẽãrũ yexera, rũ nũma nũxũ nacuax i guxũma. ²¹Pa Chaueneẽgũ ya Pexũ Changechaũgũxex, ngẽxguma taãewa nũxũ icuaxgu na Tupanaxãcũxũchi ixĩgũxũ, rũ tama taxãneẽ na nũxna ingaicamagũxũ ya Tanatũ ya Tupana.

²²Rũ nũma tá tũxna nanaxã i guxũma i tacũ i naxçax fiçaxũ erũ naga taxĩnũẽ i ngẽma tũxũ namuxũ rũ tanaxũ i ngẽma nũma namaã nataãẽxũ. ²³Rũ nũma tũxũ namu na Nane ya Ngechuchu ya Cristuaxũ yaxõgũxũ rũ yigũ ingechaũgũxũ, yema nũma tũxũ namuxũãcũ. ²⁴Rũ yĩxema naga ñnũẽxẽ i ngẽma Tupana tũxũ muxũ, rũ aixcũma Tupanaãrũ duũxũgũ tixĩgũ rũ nũma ya Tupana rũ aixcũma tũmawa namaxũ. Rũ ñuxma rũ nũxũ tacuax na aixcũma Tupanaãrũ duũxũgũ ixĩgũxũ rũ tawa namaxũxũ, erũ Naãe i Ûnẽxũ ga tũxna namuxũ tũxũ nũxũ nacuaxẽẽ.

Yĩxema tũxũ nangẽxmaxẽ i Tupanaãe i Ûnẽxũ rũ yixema tũxũ nangẽxmaxẽ i Cristuarũ uwanũãe

4 ¹Pa Chaueneẽgũ ya Pexũ Changechaũgũxex, iTãxũ i nũxũ peyaxõgũxũ i guxũma i orearũ uruũgũ i nũgũ ixugũgũxũ na aixcũma Tupanaãrũ orearũ uruũgũ yixĩgũxũ! Natũrũ name nixĩ i penangugũ i norũ ore na nũxũ pecuaxũçax ngoxita aixcũma Tupanaãe yĩxũ i nawa idexaxũ rũ exna tama. Erũ ñoma i naãnewa rũ guxũwama nangẽxma i muxũma i idorataçxgũxũ i nũgũ ixugũxũ na Tupanaãrũ orearũ uruũgũ yixĩgũxũ. ²Rũ tá pemaã nũxũ chixu na ñuxãcũ tá nũxũ pecuaxũ na texẽ tiĩxũ ya yixema aixcũma Tupanaãe tũmawa ngẽxmaxẽ. Rũ dũcax, guxũma i orearũ uruũgũ i nũxũ ixugũxũ na Tupana duũxũxũ yaxĩxẽẽxũ ya Ngechuchu ya Cristu, rũ ngẽma nixĩ i aixcũma Tupanaãe nawa idexaxũ. ³Natũrũ guxũma i ngẽma orearũ uruũgũ i tama nũxũ ixugũxũ na Tupana

duũxũxũ yaxĩxẽẽxũ ga Ngechuchu, rü ngẽma rü tama nüxũ nangẽxma i Tupanaãe i Üünexũ. Natürü Cristuarü uwanüãe nixĩ i nawa ngẽxmaxũ. Marü nüxũ pexĩnüe na ínganguxchaũxũ i Cristuarü uwanü, natürü ñuxma rü marü ñoma i naãnewa nangẽxma. ⁴Pa Chauxacügüx, pema rü Tupanaxãcügü pixĩgü. Rü marü nüxũ perüyexera i ngẽma tama aixcüma Tupanaãrü orearü uruũgü ixĩgũxũ. Erü ngẽma Tupanaãe i Üünexũ i peãewa ngẽxmaxũ rü nüxũ narüyexera i ngẽma Cristuarü uwanüãe i ñoma i naãnecũãxgüwa ngẽxmaxũ. ⁵Rü nüma i Cristuarü uwanüãrü duũxũgü rü ñoma i naãnecũãxgü nixĩ. Rü ngẽmacax ñoma i naãnechigagu nidexagü. Rü ñoma i naãnecũãx i duũxũgü rü nüxũ inarüxĩnüe. ⁶Natürü i yixema rü Tupanaxãcügü tixĩgü. Rü yĩxema Tupanaxũ cuáxe rü tüxũ itarüxĩnü. Natürü yĩxema tama Tupanaxũ cuáxe rü tama tüxũ itarüxĩnü. Rü ngẽmawa nüxũ tacuaxgü na texé tixĩgũxũ ya aixcüma Tupanaãrü duũxũgü ixĩgũxe rü texé tixĩgũxũ ya Cristuarü uwanüãrü duũxũgü ixĩgũxe.

Tupana tüxũ nangechaũ

⁷Pa Chaueneëgü ya Pexũ Changechaũgüxex, name nixĩ na yigü ingechaũgüxũ, erü Tupana nixĩ ya tüxũ ngüexẽẽcü na yigü ingechaũgüxũ. Rü guxãma ya yĩxema tümaẽneẽxũ ngechaũxẽ rü Tupanaxãcü tixĩgü rü Tupanaxũ tacuax. ⁸Yĩxema tama tümaẽneẽxũ ngechaũxẽ rü tama Tupanaxũ tacuax, erü Tupana nixĩ ya tüxũ ngüexẽẽcü na yigü ingechaũgüxũ. ⁹Tupana rü ñoma ga naãnewa nanamu

ga Nane ya nügümaã wüxicacü na yimagagu tüxũ nangẽxmaxũcax i maxũ i taguma gúxũ. Rü yemawa Tupana tüxũ nüxũ nadauxẽẽ na ñuxãcü tüxũ nangechaũxũ. ¹⁰Rü woo Tupanaxũ tangechaũgü, natürü ngẽma ngechaũ i guxũãrü yexera ixĩxũ nixĩ na nüma tüxũ nangechaũxũ rü ñoma ga naãnewa na namuãxũ ga Nane na taxcax nayuxũcax rü naxütanüãxũcax ga tórü pecadugü.

¹¹Pa Chaueneëgü ya Pexũ Changechaũgüxex, yexguma yemaãcü tüxũ nangechaũgu ga Tupana, rü ngẽmacax name nixĩ i yixema rü ta yigü tangechaũgü. ¹²Taguma texé Tupanaxũ tadau. Natürü ngẽxguma aixcüma yigü ingechaũgügu, rü Tupana rü tawa namaxũ rü norü ngechaũ rü aixcümaxũchi tórü maxũwa nangox.

¹³Rü nüma rü marü tüxna nanamu ga Naãe i Üünexũ. Rü ngẽmawa nüxũ tacuax na aixcüma norü duũxũgü ixĩgũxũ rü nüma rü tawa na namaxũxũ.

¹⁴Rü tomatama nüxũ tadaugü rü nüxũ tixuchigagü na Tanatü ya Tupana núma namuxũ ga Nane na guxũma i duũxũgüxũ namaxẽẽxũcax. ¹⁵Rü yĩxema yaxóxe rü nüxũ ixuchigaxe na Tupana Nane yĩxũ ya Ngechuchu, rü aixcüma Tupanaãrü duũxũ tixĩ, rü Tupana rü tümawa namaxũ. ¹⁶Rü yixema nüxũ tacuaxgü rü tayaxögü na Tupana rü poraãcü tüxũ nangechaũxũ, erü nüma nixĩ i aixcüma guxãxũ nangechaũxũ. Rü yĩxema aixcüma tümaẽneẽxũ ngechaũxẽ, rü Tupanaãrü duũxũ tixĩ, rü nüma ya Tupana rü aixcüma tümawa namaxũ. ¹⁷Rü ngẽxguma aixcüma Tupanaxũ ingechaũgügu, rü tórü maxũwa nangox i

ngêma, rü tãütáma nüxũ tamuũẽ i ngêma ngunexũ i nagu tũxũ yacagũxũgu naxçax i tórũ maxũ. Erũ woo ñoma i naãnewa tangêxmagũ, natürũ napexewa rü Cristurũ tixĩgũ. ¹⁸Rü ngêxguma aixcũma Tupanaxũ ingechaũgũgu, rü nüxũ tacuax na tãütáma tũxũ napoxcuexũ, rü ngêmacax taxucaxma nüxũ tamuũẽ. Natürũ ngêxguma chi nüxũ imuũẽgu, rü nüxũ tacuax na tama aixcũma nüxũ ingechaũgũxũ. ¹⁹Rü yixema rü Tupanaxũ tangechaũgũ, yerũ nüxĩra tũxũ nangechaũ ga nũmax.

²⁰Ngêxguma chi texé:

“Choma rü Tupanaxũ changechaũ”, ñagũgu, natürũ tũmaẽneẽchi taxaixgu, rü tidora. Erũ ngêxguma tama nüxũ tangechaũgu i tũmaẽneẽ i nüxũ tadauxũ rü taxuacũma nüxũ tangechaũ ya Tupana ya tama nüxũ tadaucũ. ²¹Rü Ngechuchu ya Cristu tũxũ namu rü ñanagürũ:

“Yíxema Tupanaxũ ngechaũxẽ, rü name nixĩ na tũmaẽneẽxũ rü ta tangechaũxũ”, ñanagürũ.

Nüxũ tarüyexera i ñoma i naãneärũ ngúchaũgũ

5 ¹Ngechuchu rü Tupana Nane ya Cristu nixĩ. Rü guxáma ya yixema nüxũ yaxóxẽ, rü Tupanaxácũ tixĩgũ. Rü yixema Tanatũ ya Tupanaxũ ngechaũxẽ, rü nüxũ tangechaũ ta i guxũma i naxácũgũ. ²Rü ngêxguma Tupanaxũ ingechaũgũgu rü naxũxgu i ngêma nũma tũxũ namuxũ, rü nüxũ tacuax na aixcũma nüxũ ingechaũgũxũ i ngêma naxácũgũ ixĩgũxũ. ³Rü ngêxguma aixcũma Tupanaxũ ingechaũgũgu rü

naga taxĩnüẽ i ngêma tũxũ namuxũ. Rü ngêma tũxũ namuxũ rü tama naguxcha na naga ixĩnüẽxũ. ⁴Erũ guxáma ya aixcũma Tupanaxácũ ixĩxẽ, rü tama ñoma i naãneärũ ngúchaũ i chixexũgu tarũxĩnũ. Rü yixema rü tayaxógũ, rü ngêmacax tama name i ñoma i naãneärũ ngúchaũ i chixexũgu tarũxĩnüẽ. ⁵Rü yixema yaxóxẽ na Tupana Nane yĩxũ ya Ngechuchu, rü yixema tixĩ ya tama ñoma i naãneärũ ngúchaũ i chixexũgu rũxĩnüxẽ.

Ore i Tupana Nanechiga

⁶Rü nüxũ tacuax na aixcũma Tupana Nane yĩxũ ya Ngechuchu. Yerũ yexguma ñoma ga naãnewa nayexmagu rü dexáwa ínabaiegu, rü nũmatama ga Tupana nüxũ nixu na Nanexũchi yĩxũ. Rü yexguma curuchagu nayũxgu rü nagũ inabaãgu ga Ngechuchu, rü Tupana rü wenaxärũ inanawex na aixcũma Nane na yĩxũ. Rü ngêxgumarũ ta i ngêma Naãẽ i Üünexũ i taguma idoraxũ, rü tũxũ nüxũ nacuaxẽẽ na aixcũmaxũchi Tupana Nane na yĩxũ. ⁷Rü ngêmaäcũ tũxũ nangêxma i tomaẽxpũx i cuaxruũgũ i tũxũ nüxũ cuaxẽẽxũ na aixcũma Tupana Nane yĩxũ ya Ngechuchu. ⁸Rü ngêma norũ wũxi nixĩ i Naãẽ i Üünexũ, rü ngêma norũ taxre nixĩ ga yema Tupana ga yexguma Ngechuchu dexáwa íbaiegu, rü ngêma norũ tomaẽxpũx nixĩ ga yema Tupana üxũ ga yexguma curuchagu nagũ inabaãgu ga Ngechuchu. Rü guxũma i ngêma tomaẽxpũx, rü wũxigu nüxũ nixu na aixcũma Tupana Nane yĩxũ ya Ngechuchu. ⁹Nüxũ tayaxógũ i duũxũgũ

ega tacũxũ tamaã yaxugũgu. Natũrũ Tupanaãrũ ore nixĩ i yexeraãcũ aixcũmaxũchi ixĩxũ. Rũ Tupana nixĩ ya tamaã nũxũ ixucũ na Ngechuchu rũ Nane yĩĩxũ. ¹⁰Rũ yĩxema nũxũ yaxóxẽ ya Tupana Nane rũ nũxũ tacuax na aixcũma yĩĩxũ i ngẽma ore i Tupana nũxũ ixuxũ i Nanechiga. Natũrũ yĩxema tama Tupanaãxũ yaxóxẽ rũ dorataax nũxũ tawogũ ya Tupana erũ tama tayaxõ i ngẽma ore i Tupana nũxũ ixuxũ i Nanechiga. ¹¹Rũ ñaã nixĩ i norũ ore ya Tupana i tamaã nũxũ yaxuxũ, rũ:

“Chomatama marũ pexna chanaxã i maxũ i taguma gũxũ. Rũ ñaã maxũ rũ Chaunegagu pexũ nangẽxma”,

ñanagũrũ. ¹²Yĩxema nũxũ yaxóxẽ ya Tupana Nane rũ tũxũ nangẽxma i ngẽma maxũ i taguma gũxũ. Natũrũ yĩxema tama nũxũ yaxóxẽ ya yima Nane rũ tama tũxũ nangẽxma i ngẽma maxũ.

**Cuáũ rũ ñuxre ga norũ ucuxẽmaã
inayacuaxẽẽ ga norũ popera**

¹³Pa Chaueneẽgũx ya Tupana Naneãxũ Yaxõgũxex, pexcax chanaxũmatũ i ñaã ore na nũxũ pecuáxũcax na pexũ nangẽxmaxũ i ngẽma maxũ i taguma gũxũ. ¹⁴Rũ ngẽmacax tama taxãneẽ na nũxna ingaicamagũxũ ya Tupana. Rũ nũxũ tacuaxgũ ega tacũcax nũxna icaxgu, rũ nũma tũxũ naxĩnũ i ngẽxguma norũ ngũchaũ yixĩgu i ngẽma naxcax nũxna icaxũ. ¹⁵Rũ ngẽxguma nũxũ icuaxgu na nũma tũxũ naxĩnũxũ i ngẽxguma tacũcax nũxna icaxgu, rũ nũxũ tacuax ta na tũxna naxããxũ i ngẽma naxcax

nũxna icaxũ. ¹⁶Rũ ngẽxguma chi texẽ nũxũ dauxgu i tũmaẽneẽ na pecadu naxũxũ, rũ name nixĩ na naxcax tayumũxẽxũ ega tama pecadu i iyanatauxẽẽxũ yixĩgu. Rũ Tupana tá nanamaxẽẽ i ngẽma tũmaẽneẽ ega tama pecadu i iyanatauxẽẽxũ yixĩgu. Nangẽxma i pecadu i tũxũ iyarũtauxẽẽxũ. Rũ ngẽxguma ngẽma pecaduwe naxũãmagu i wũxi i peeneẽ, rũ tama pemaã nũxũ chixu na naxcax peyumũxẽgũxũ. ¹⁷Guxũma i chixexũ i ixũxũ, rũ pecadu nixĩ. Natũrũ nangẽxma i pecadu i tama tũxũ iyarũtauxẽẽxũ.

¹⁸Rũ nũxũ tacuax, rũ yĩxema Tupanaxãcũ ixĩxẽ, rũ tama pecadu taxũiecha, erũ nũma ya Tupana Nane rũ tũxna nadau. Rũ taxuacũma tũxna nangaicama i ngoxo i Chataná i tũxũ pecaduãxẽẽchaũxũ. ¹⁹Nũxũ tacuaxgũ na Tupanaxãcũgũ ixĩgũxũ, natũrũ guxũma i ñoma i naãnecũãx rũ ngoxo i Chatanámxẽẽwa nangẽxmagũ. ²⁰Rũ nũxũ tacuax ta na ñoma ga naãnewa nanguxũ ga Tupana Nane, rũ tũxna nanaxã ga cuax na nũxũ icuaxgũxũcax ya yima aixcũmaxũchi Tupana ixĩcũ. Rũ norũ duũxũgũ tixĩgu ya yima aixcũmaxũchi Tupana ixĩcũ, erũ Nane ya Ngechuchu ya Cristuarũ duũxũgũ tixĩgu. Rũ nũma ya Tupana Nane nixĩ i aixcũmaxũchi Tupana yĩĩxũ rũ tũxna naxããxũ i maxũ i taguma gũxũ. ²¹Pa Chauaxacũgũx, iPegũna pedaũgũ na tama nũxũ peyaxõgũxũcax i tupanachicũgũ! Rũ ngẽxĩcatama nixĩ i chorũ ore i pemaã nũxũ chixuxũ.

*Rũ nuãma pexna,
Cuáũ*